

Nunat Avannarliit Killiit Killiit Siunnersuisooqatigiiffiata kaammattuutitut aalajangersagaanut nr. 2/2020-mut Inatsisartut tapersiinissaat pillugu Inatsisartut aalajangiiffigisassaattut siunnersuut:

**Nunat avannarliit killiit Siunnersuisooqatigiiffiata Savalimmiuni Landstyri, Kalaallit Nunaanni Naalakkersuisut aamma Islandimi naalakkersuisut kajumissaarpai issittumi suliaassat pillugit suleqatigiinnissaat – taakkua ataaniillutik ministerit issittumi suliaassanut akisussaaffeqartut minnerpaamik ukiumut atasiarlutik ataatsimiittassasut – makku siunertaralugit:**

**- Nunat avannarliit killiit Issittoq pillugu soqutigisaasa nukittorsarlugillu ataqatigiissaarnissaat**

**- Issittumi allanngoriartornerit pillugit Atlantikoq avannarleq ukkatarineqarnerulersinneqarnissaa**

**- Issittumi allanngornerit nassatarisaannik nunat avannarliit killiit sumiiffiini imaanut, avatangiisinut, inunnut inuussutissarsiornermullu attanneqarsinnaasunik aaqqiissutissanik suliaqartoqassasoq**

**- Nunat Avannarliit Killiit Siunnersuisooqatigiivivut ataqatigiissakkamik ilisimatitsisarnissaq – tassunga ilanngullugit, Nunat avannarliit killiit Siunnersuisooqatigiivisa issittumi soqutigisat pillugit suleqatigiivi – Nunat avannarliit killiit naalakkersuisuisa issittumi soqutigisat aammalu Issittumi Siunnersuisooqatigiinni kissaataat pillugit.**

(Aallartitat siulittaasuat Pipaluk Lyngé-Rasmussen).

### **Akissuteqaat**

(Nunalerinermut, Imminut Pilersornermut, Nukissiutinut Avatangiisinullu Naalakkersuisooq)

### **Suliap siullermeerneqarnera**

Naalakkersuisut kaammattuummumut qujavugut, Nunat avannarliit killiit Siunnersuisooqatigiit innersuussutaat nr 2/2020, nunat avannarliit killiit pingasuusut naalakkersuisuisa issittoq pillugu suliaasaqarfinnut suleqatigiinnissaannut – taakkua ataaniillutik issittoq pillugu suliaassanut ministerit akisussaasuusut minnerpaamik ukiumut atasiarlutik ataatsimiittarnissaannut – makku pillugit:

- Nunat avannarliit killiit Issittoq pillugu soqutigisaasa nukittorsarlugillu ataqatigiissaarnissaat

- Issittumi allanngortornerit pillugi Atlantikoq avannarleq ukkatarineqarnerulersinneqarnissaa

- Issittumi allanngornerit nassatarisaannik nunat avannarliit killiit sumiiffiini imaanut, avatangiisinut, inunnut inuussutissarsiornermullu atuilluartuunikkut aaqqiissutissanik suliaqarnissamut

- Nunat avannarliit killiit Siunnersuisooqatigiivivut ataqatigiissakkamik ilisimatitsisarnissaq – tassunga ilanngullugit, Nunat avannarliit killiit Siunnersuisooqatigiivisa issittumi soqutigisat pillugit

suleqatigiissui – Nunat avannarliit killiit naalakkersuisuisa issittumi soqutigisat aammalu Issittumi Siunnersuisooqatigiit pillugit kissaataat.

Naalakkersuisut ersarissumik anguniangaraat nunat tamalaat akornanni oqallittarfinni peqataaffigisatsinni nunat tamalaanik suleqateqarluarnissaq.

Issittormiuusutut issittumilu naalangaaffittut Issittumi Siunnersuisooqatigiinni sulineq pingaaruteqartorujussuuvoq. Naalakkersuisuniillu ukkatarineqarpoq, Kalaallit Nunaata ersarissumik namminerisamillu nipeqarnissaa. Taamaammallu Islandimik Savalimmiunillu suleqatigiinitsinni oqallittarfigut annertuumik nuannaarutigaaqut, tassani issittumut apeqqutit oqaluuseralugillu immitsinnut isumassarsiorfigisaratta. Tassani aamma pineqarlutik kunngeqarfiup nutaatut nunanut allanut-, sillimaniarnikkut- illersornissamullu politikimi attaveqatigiinnermut suleqatigiissui pilersitaanut, aamma Savalimmiunit peqataaffigineqartumut, nunallu marluk akornanni Islandimik attaveqatigiinnitsinni, kingullermik naqissuserneqartoq siunnerfeqatigiilluni ataatsimut atsioqatigiinnermik (Joint Declaration septemberimi 2021), Nunat avannarliit killiit ministeriisa ataatsimeeqatigiittarnerinut kiisalu Nunat avannarliit ministeriisa siunnersuisooqatigiinni. Tamanna tunngavigalugu Naalakkersuisut isumaqarput nunat avannarliit killiit issittumut akisussaasuusut ministeriisa minnerpaamik ukiumut ataasiarlutik ataatsimiittarnissaat pisariaqanngitsoq.

Naalakkersuisut nunat avannarliit killiit suleqatigiinnerata nukitsorsarnissaanut periarfissaasut Nunat avannarliit killiit Siunnersuisooqatigiivisa anguniakkatut siunniussimasaanut kiisalu nunat avannarliit killiit naalakkersuisuisa Issittoq Atlantikoq avannarlerlu pillugit nunat avannarliit killiit oqaloqatigiinnerannut tapiissuteqaataat pitsaasutut isigaat.

Taamatut oqaaseqarluta siunnersuut itigartinneqassasoq Naalakkersuisunit inassuteqaatigaarput.